



SURAT KHABAR	:	KOSMO	
TARIKH	:	10/2/2019	MUKA SURAT : 6
JABATAN	:	PERHILITAN	
KLASIFIKASI	:	<b>PERHATIAN</b>	

Polis percaya haiwan eksotik itu dibeli daripada pemburu haram sebelum diproses

## Polis rampas 2.8 tan tenggiling beku

**TUARAN** - Polis Sabah menahan seorang lelaki tempatan dan merampas tiga kontena memuatkan 1,860 kotak berisi daging tenggiling beku seberat 28,000 kilogram di sebuah gudang pengumpulan di Kampung Bontoi, Jalan Tamparuli dekat sini semalam.

Pesuruhjaya Polis Sabah, Datuk Omar Mammah berkata, ia susulan serbuan dilakukan polis dengan kerjasama Jabatan Hidupan Liar (JHL) Sabah di sebuah kilang memproses daging dan kulit tenggiling secara haram di Taman Perindustrian Kota Kinabalu Selatan, Jalan Sepanggar-Manggatal pada Khamis lepas.

Menurut Omar, dalam serbuan dan pemeriksaan di kilang itu kira-kira 8.46 malam itu, polis dan pegawai JHL Sabah turut merampas sebuah kenderaan serta 35 ekor tenggiling hidup yang disimpan di belakang but kereta itu, selain turut menemui dua karung plastik berisi sisik



OMAR (dua dari kanan) menunjukkan daging tenggiling beku yang ditemui di dalam tiga buah kontena di sebuah gudang pengumpulan di Kampung Bontoi Jalan Tamparuli, Tuaran semalam.

tenggiling dan sebuah alat pemnimbang digital.

“Anggaran keseluruhan rampasan bernilai RM8.4 juta meliputi 61 tenggiling hidup, 361 kilogram sisik tenggiling, 572 ekor tenggiling beku, tiga kontena berisi 1,860 kotak tenggiling beku, dua ketul kaki haiwan

disyaki beruang, empat ekor kenderaan bakul beku dan beberapa kenderaan dirampas di kilang itu,” katanya dalam sidang media di gudang itu semalam.

Turut hadir Ketua Polis Daerah Kota Kinabalu, Asisten Komisioner Habiibi Majinji, Ketua Polis Daerah Tuaran, Deputy

Superintendent Dzulbaharin Ismail dan Pengarah JHL Sabah, Augustine Tuuga.

Jelas Omar lagi, hasil siasatan awal mendapati suspek lelaki berumur 35 tahun terbabit bertindak sebagai pengurus di kilang itu yang dipercayai telah beroperasi sejak tujuh tahun lalu.

Tambahnya, suspek dipercayai membeli kesemua tenggiling itu daripada pemburu haram yang kemudian akan dikumpulkan sebelum dihantar ke kilang terbabit untuk diproses oleh pekerja kilang.

“Daging tenggiling akan dibungkus, dikotak dan ditan-tar ke tempat penyimpanan gudang ini yang disewa sebelum dipasarkan ke pasaran tempatan dan Sarawak,” katanya yang tidak menolak kemungkinan daging tenggiling beku itu turut dipasarkan ke luar negara.

Dalam pada itu, Omar berkata, polis akan menjalankan siasatan lanjut bagi mengenal pasti individu terlibat dalam kes itu

termasuk pemilik dan pekerja kilang selain mengesan pemburu haram berkaitan memburu dan memproses spesies hidupan liar dilindungi seperti tenggiling adalah satu kesalihan dan boleh ditangkap.

“Polis juga akan menyiasat mana-mana restoran membeli tenggiling atau spesies hidupan liar dilindungi yang lain,” katanya yang turut meminta kerjasama orang ramai untuk tampil sekiranya mempunyai maklumat mengenai kes pemburuan haram dan penyeludupan hidupan liar.

Kes disiasat di bawah Seksyen 41(1) Enakmen Pemeliharaan Hidupan Liar 1997 yang boleh membawa hukuman denda tidak kurang daripada RM50,000 dan penjara selama tidak kurang setahun dan tidak lebih lima tahun.

Tenggiling merupakan spesies hidupan liar dilindungi sepenuhnya di Sabah mengikut Jadual I Enakmen Pemeliharaan Hidupan Liar 1997. - Bernama